

Schnitzelbankfest 1990 "Panzerknackerklickä"

1. Ihr fröged Eu jetzt sicher was söll denn das da sii  
oh je mine jetzt ischs so wiit jetzt sind die au debii  
Ihr mühend jetzt eifach lose für das sind Ihr ja cho  
und wer jetzt na verreise wot machts bitte subito.  
Ref. Läck isch das en Schiissdräck wänt da ine bisch  
dusse wärs jetzt cheibe glatt will z'Wädi Fasnacht isch
2. Du ribsch der dini Auge und wirsch ganz langsam blass  
chasch es fascht nöd glaube meinsch es seig en Gspass  
zwei tanzed eng umschlunge luegsch zu bisch ganz perplex  
si säged dem Lambada ich hett gseit das isch Sex.
3. Z'Steihuuse stah es Hüttli es Asylantehuus  
am Strebel sini Goofe sie wüetet sisch en Gruus  
und Zuger Poliziste die händ sich eifach trüllt  
und während dems sich kehrt händ, händs ihri Pämpers gfüllt.
4. Mer gseht si immer öfters si gsehnd zum göisse drii  
das DDR Export Produkt mues öppis psunders sii  
si zahled dumm und dämmlich wänns gaht us erster Hand  
für so e huere Rochle für so en stinck Trabant
5. Alle Jahre wieder sisch immer öppe s'glich  
macht er es halbs Jahr Färiä isch trotzdem gar nöd riich  
mer versuechts mit dickä Schlösser, Gräbe und höche Türm  
doch s'mues nur Summer wärde scho verreist de Walti Stürm
6. D'Berlinermuur isch zämegheit wird nümme repariert  
doch villi Lüüt die wüsset nöd wiso das isch passiert  
de starch Betong vo dere Muur de häts eifach ufgweicht  
will s'Füürwehripiket Wädischwil im Suff hät here gseicht.
7. Stolziere tüents wie Pfaue am Samstag Namitag  
de Rhyner lähnet locker am nöchste Gartehaag  
jetzt weiss ich wiso jedi Frau uf de Chüngel stiert  
d'Wädischwiler Polizei isch neu uniformiert.
8. Als Eidgenoss da häsch es schwer mer hätts letschdi vernoo  
dörfsch nöd emal me stöhne wänt zum Höhepunkt bisch cho  
denn BuPo - Lüüt sind überall und händ gschnell registriert  
was i de schwitzer Ehebett alles so passiert.
9. Absiets vo allem Läbe da stiegt es riese Fäscht  
zum Glück hetts niemert gmerkt gha susch hetts na öppis koscht  
mit Coupons, Bons und Märggeli wird nöd vill konsumiert  
d'Calüppso eusi schlaue die hend das schnell kapiert.
10. Es rumplet, knirscht und krachet im Strandbad z'Wädischwiil  
es wird alls neu geschalttet de Stimmbürger choschts vill  
doch eis ihr liebe Gneindröt das isch und blibt eso  
Klähralag vo Wädischwil die stinkt halt immer na.
11. S'ich birreweich und zimmi scharf, Füdli gsehsch und Schöppe  
ich säges nöd gern, ich säges nöd luut und lueges doch na öppe  
d'Blueme bruched Wasser min Chare suuft Benzin  
ich bruche das vom RTL s'Männermagazin
- 12.

12. Wänn Schmärze häsch im Rugge oder a de Bei  
 chasch nümme goge chrüpple liisch chrank im Nescht dehei  
 denn gitte e Alternative zu de Fangotherapie  
 es tuet zwar echli miife s'Algebad z'Rimini
13. Pompös, grandios, bombastisch was choschtet das isch glich  
 wenn anderi au tüend hungere mir sind ja schliesslich rich  
 e Krypta inne männe in dolci jubilo  
 doch dunkts mi das e neuu Chile günstiger wär cho
14. Schwitzer Volgge schogeli spinne wotsche geini Arme  
 dogge sini Frau tuede nei stimme ätte das sofort gseh  
 wänn ihri Maa nöd umerobbe vor de Err Major  
 ätte si nie Zitt zum mitämir magge bitzeli Amor
15. Fantasii bi Lehrer das isch halt so e Sach  
 immer sglich verzelle da wird es Hirni flach  
 de Haschisch i dem Guetzliteig wo mir hend verwütscht  
 hett bi eusne Pädagoge sicher vill me gnützt.
16. Ferie im Süde sind verbote das giltet ab sofort  
 und dezue chunt das isch klar Solariumverbot  
 kei dunkli Gründe wännts me gseh das isch ihrer Ziil  
 ja sind den die nöd hirnverbrännt d'Behörde z'Richterschwil
17. Es isch wie wämmer ame Chind die Schoppe tuet wägnäh  
 die feini Saft drususe nimmt und neu ifüllt mit ...wäääääääck.  
 isch das nöd e Sauerei und es riise Gwurg  
 jetzt gänds eus nur na Gülle z'suufe brout vo Friiburg
18. So mir wäred vertig das isch es jetzt scho gsii  
 ihr chönd eu jetzt erhole miteme Glesli Wii  
 doch bevor ihr trinked und eu am Schnaps higänd  
 verlanged doch e Zuegab und chlatsched fescht i d'Händ
19. Brümm,brümm,brümm..... Brümm, Brümm, mit dem Argumänt  
 chunsch bi eus in Wädischwil bis is Parlament
20. S'tuet eine renoviere er steckt vill Chole drii  
 und wotts amortisiere scho isch de Gschpass verbii  
 en Nachteil gits bi dere Sach de Coiffeur Kuenz häts gseh  
 sitt er sin Saloon umbaut hätt, hätt er kei Chuntschaft meh.

MUSIK: Polo Hofer "Zampanoos Variete"